



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : UNITED CHRISTIAN COLLEGE (KOWLOON EAST)

學校名稱 : 滙基書院（東九龍）

Name of Play 劇名 : 露人甲

Script writer 劇作者 : 林蔚祺（學生）

Synopsis 故事大綱：

本劇記述一名露宿者在碼頭生活的點滴，從各方面分析露宿者的心路歷程。由當初被趕出家門，到在工作場所遇到不公對待，再到露宿街頭，本劇記錄弱勢社群的種種慘況。正當以為生活終於可以穩定下來，卻遇著新冠病毒疫情來襲，加上商家突然加快腳步發展商業，主角生活再次推倒重來。遇上突如其來的變化，到底他能夠克服困難，還是繼續成為社會眼中的路人甲？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

[第一場]

地點：觀塘碼頭 (露宿者居住地)

人物：陳芷澄、余凱韻、李顯如、輝、俊、強哥

(有班學生等緊船，嘈)

陳芷澄：早晨！（見到另外兩個朋友）余凱韻：早晨啊！

李顯如：（串嘴）喂好心你啦咁遲！今日凍成咁樣仲要我哋喺度等你！

陳芷澄：（尷，乾笑）嘻，唔好意思囉！今日咁凍我離唔開個被竇呀！（笑）嘩你兩個搞咩呀？一個就用新袋，一個就新鞋，去玩啫，駛唔駛咁曬命法呀你兩個。（笑）

李顯如：梗係啦！（望）出去玩去影靚相仲唔著對新鞋咩！呢對仲要嘢日先最新出架！勁呢！（招積）

余凱韻：我就差你少少啦，呢個袋係前日出嘅，我晨咁早去舖頭排隊先買到架！

陳芷澄：嘩你兩個...潮流達人，真係唔夠你哋嚟呀！（停頓）係喎，趁未有船到，食個包先。

余凱韻：你不如上到船先食啦，呢排多左咁多人搭船，啲班次密咗咁多，好快有下一班架啦。

陳芷澄：哦咁好啦。但係點解會突然多左人嚟搭船嘅？

余凱韻：咁呢排疫情吓嘛，個個都話咩「要保持空氣流通」，咁咪個個都走嚟搭船囉。

陳芷澄：咁又係，搭船真係舒服好多，起碼唔駛貼住人地個背脊。

（學生遇露宿者）

李顯如：（揷住個鼻）哇點解突然間咁臭架...嘩！點解咁多人腳喺呢度架！

（嫌棄）

余凱韻：唔知喎，貪海邊夠 feel 呱！（笑）

李顯如：好心就唔好喺度腳啦！擺啲嘢喺度又阻住條路、又臭！



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

陳芷澄：你唔好咁衰啦，佢地可能都係被迫架咋。

李顯如：邊有得迫架？瞓喺度梗係自己揀架啦。

（老鼠經過）

李顯如：嘩！（大聲）點解會有老鼠架！（嚇親，彈起）仲要踩我對鞋！我新買架！（即刻彎腰抹）

余凱韻：肯定係嗰啲人帶返嚟架啦。真係好污糟邋邋。（嫌棄）

李顯如：唉...（著急）點解抹極都硬係好似唔乾淨咁架...

余凱韻：喂個邊仲有隻啲！（笑）李顯如：唔好嚇我啦！

輝：唉！（激氣）嘈嘈嘈！嘈咩呀！

陳芷澄：喂喂喂你哋靜少少啦，嘈親人哋喇。咦，有船啦啲！快啲行啦！

余凱韻：行啦！上到船再慢慢抹啦！（嘲笑）

輝：唉！（起身）真係吖！見到有人就唔該靜啲啦！識唔識尊重架！

俊：咁你真係遮住咗自己吖嘛！人地點睇到啫。（笑）

輝：（停頓）乜你喺度嘅？你今日放假咩？

俊：係無得撈，唔係放假。（表面輕鬆、但實質無奈）

輝：你都俾人炒？（驚訝）

俊：有乜咁出奇吖，依家個個都自身難保啦。

輝：（仍然驚訝）係，不過我真係無諗過連你都會俾人炒啲，你老細話曬都係你老死。

俊：依家個個都一定係保自己先架啦，好正常啫。

輝：都係嘅...唔緊要啦！再搵過份囉！我地呢啲...流動性好大架啫！

俊：啱啊。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

輝：咁你打算點啊？hea 吓先再搵呀？

俊：係呀，反正平時都無得啱，趁依家啱返兩日先。(停頓) 你呢？又望住張相，掛住屋企咪返去囉。

輝：唔返啦，佢哋都唔會想見到我架啦。

俊：點會呀？上次你家姐嚟搵你嘅時候先話你阿媽想見下你，佢都講到出口啦，你咪返去見下佢囉。

輝：佢唔要我在先嘅，我做乜要去搵佢啫。

俊：好心你啦，難得有個家姐阿媽喺度等你，就返去見吓佢地啦。你估個個都有屋企人等咩。

輝：唉你唔明架喇，佢地根本就係睇我唔起，唔通我仲要返去俾佢串多兩句咩。間唔時睇吓張相咪算囉。

俊：你日日睇埋同一張，你估佢地個樣唔會變架咩。

輝：咁我係得一張咋嘛，可以點啫？況且呢張影得幾好吖，唯一一張齊齊整整，歷史遺物嚟啦！（苦笑）

俊：擺嚟睇吓！（輝擺張相遞向鏡頭，俊接，俊睇，停頓）又真係影得幾靚嘅...唉你慢慢懷念啦吓！

輝：擺返嚟啦！呢啲嘢我真係要好好保存架。（交接）我返工喇！你慢慢食啦！（著鞋走）

（電話響）

輝：（聽電話）喂強哥！我嚟緊架啦！

強哥：（凝重）喂，阿輝，你...你今日唔駛嚟喇。輝：點解呀？今日舖頭休息咩？

強哥：er...唔係...（有口難言）er...就咁嘅，我老婆前兩日睇過曬呢幾個月份帳簿，咁就...就...都蝕咗唔少咁囉。

輝：哦，咁即係....

強哥：阿輝呀，不如你...你搵過另一份工做啦...我呢度、我呢度都捱唔到好耐架咋。

輝：但強哥，我喺你呢度做咗咁耐，好難話走就走架啫...你都知我咁嘅背景，出面無幾多個會請我。

強哥：我都知，咁但係...但係我真係自己都就嚟顧唔掂喇，你都知啦，我仲有老婆子女要養架嘛...

輝：...都係嘅！明架喇！